

Guhdoj Dwg Famhfap

赌博是犯法

Cinz Genmouz / 覃建谋

Sai: Guhdoj dwg famhfap
Meuzdiet dwg fouzhingz
Bouxlawz mbouj siujsim
Deng gap din ga goenq

Mbwk: Bya mboujlwnh hung'iq
Mbouj ndaej diuq hwnj haenz
Veizfap gangj swyouz
Dai gwnz haenz ndongjndot

Sai: Guhdoj lumj gwndoeq
Hainduj gwn saek di
Gwn ndaej baez doek baez
Ciuhvunz gaiq mbouj bae

Mbwk: Cujsiz Siz Ginbingz
Heuh raeuz gangj vwnzmingz
Mboujlwnh vunz gijmaz
Cungj mbouj ndaej guhdoj

Sai: Sevei gyacizgvanh
Lumj daengngoenz nei rongh
Ciuq ngoenz lienz daengz haemh
Dazyinx vunz guh saeh

Mbwk: Daj Buenzgoj roengzdaeuj
Ndaem naz ndaej gwn haeux
Guhdoj siengj fatcaiz
Dungx iet dai gwnz roen

Sai: Cujsiz Siz Ginbingz
Son lwgminz roxyiuj
Gaenx guh byaij roen fouq
Guhdoj hoj daengz dai

Mbwk: Cujsiz Siz Ginbingz
Son gyoengqvunz gwnzbiengz
Guhhong liz hoj gyae
Guhdoj baenz gaujvaq

Sai: 360 hangz
Hangzhangz ok canghyienz
Bouxgik bae doj cienz
Gag byaij hwnj lohgungz

Mbwk: 360 Roen
Diuzdiuz doeng loh fouq
Cijmiz bae guhdoj
Dwg diuz roen ra dai

Sai: Gaenx guh reih guh naz
Cancan miz bya noh
Bae guhdoj raqraq
Bae ngaenz lij deng gyaeng

Mbwk: Dojciengz nywsaejgoenq
Boux sien gwn hix dai
Ganginaeuz vunzbiengz raeuz
Baez bungq mingh mbouj miz

Sai: Dojciengz youq giz ndaem
Cauzlak fanh ciengh laeg
Mwngz ciengeiz geiq ndaej
Doek roengz gouq mbouj hwnj

Mbwk: Dojciengz cingj fouzdae
Vunz mbouj ndaej bae gyawj
Danghnaeuz byawz mbouj dingq
Ranz caiq miz hix gungz

Sai: Canghgyah hai dojciengz
Couh lumj vunz doj bya
Cijaeu mwngz bak ngah
Baez gwn couh hwnj ngaue

Mbwk: Guhdoj lumj doj bya
Yaeuh vunz gwn ngaeubya
Daengz mwngz gwn seizhaenx
Deng ngaue deuz mbouj ndaej

Sai: Gyanghaet bae geij maenz
Gyanghaemh saw baenz fanh
Ngaenz cienzbouh saw liux
Lumj hanq deng cienz bwn

Mbwk: Hainduj bae geij faen
Doeklaeng saw daengz cien
Ngaenz saw bae seuqsat
Lumj duzdangh bok naeng

Sai: Miz vunz vih guhdoj
Bienq bae caeg doxgaiq
Deng moeb gen ga raek
Lij deng daep gazfwngz

Mbwk: Miz vunz saw ngaenz lai
Deng gai gyadangq caez
Yah caeuq lwg mbouj aeu
Ngoenznaeng youq dojciengz

Sai: Mbanj gou Cieng Daegsam
Geij bak fanh gyacaiz
Doj saw bae daiq lai
Daengz dai mbouj miz faex

Mbwk: Hawj hingz duznou gonq
Doeklaeng saw duzvaiz
Yied doj saw yied lai
Lwg yah gwn raemx gvaq

Sai: Miz vunz vih guhdoj
Bae lanz loh gaj vunz
Deng buenq hawj swjhingz
Mingzsing haeu lumj haex

Mbwk: Son lwglan daihlaeng
Guhdoj haih vunz lai
Bae ngaenz dwg saeh iq
Lau mingh hix boiz haeuj

Sai: Danhfanz aen dojciengz
Cungj dwg rongz duzdoq
Bouxlawz byaj haeujbae
Boux haenx dingh boihseiz

Mbwk: Gou lwnh hawj caezgya
Vunz guhdoj deng haih
Dojciengz dwg feizhaij
Haeujbae nanz dauqma



Veiz Gozcingh Sangcieng Cawj-guenj Guengjsae Ngeihcib Bi

韦国清上将主政广西二十年

Cinz Siengzcouh Liuz Gingliuj Cinz Siengzgen hoiz

Dangyienz, gij cingzcik 20 bi neix aeu ndaej, mbouj dandan dwg gij goenglauz Veiz Gozcingh gag boux de, gij cingzcik neix dwg gij ganbu gak gaep caeuq vunzlai gak cuz Guengjsae youq dangcunghyangh dazyinx lajde haenqrengz guh hong aeu ndaej. Hoeng, ndaej gij cingzcik neix, caeuq Veiz Gozcingh yawj ndaej gig gyae dwk cienzmienh dazyinx caeuq gig miz cingzyauq dwk cujciz bae guh hong doxbaen mbouj ndaej.

De cungsaed hengzguh gij cwng-cwz minzczuz aendangj, laemxsim veizhu guekgya doengjit. De dwg boux goengdaeuz Bouxcuengh, baenzciuh genhciz gij ngeixfap minzczuz Maj-gwzswh, daj aen daengxbuenz leih'ik dangj caeuq lwgminz hwnjdin, cingq-ceq cawjleix gij gvanhaeh Boux-cuengh、Bouxgun caeuq minzczuz vunznoix wnq ndaw swcigih, vih coicaenh minzczuz doxbingz、doxgiet

caeuq doengzcaez hwngvuengh guh hong gig haenqrengz sijsaeq, hawj Swcigih Bouxcuengh Guengjsae baenz aen yienghndei minzczuz doxgiet daengx guek goengnyinh ndeu.

De laemxsim hengzguh gij loh-sienq ganbu daek caiz doq miz、genj yungh boux mizcaiz aendangj raeuz, genhciz gauj haj huz seiq haij. De doiq ganbu gak minzczuz, ganbu diegrog caeuq ganbu bonjdieg, ganbu deihfueg caeuq ganbu ginhdui, ganbu

gaeuq caeuq ganbu moq, coengzlaiz cungj dwg bingzdaengj doiqdaih, mbouj faen caen mbouj caen, mbouj laeb gyaaujbya, mbouj gauj coengbai. Couhcinj gij vunzhong henz ndang, cungj youz cujciz anbaiz. De ciuq gij yienhsaed ganbu Guengjsae, youq roengzrengz hawj gij ganbu daj diegrog daeuj ndaej ciengzgeiz louz youq Guengjsae simnet guh hong seiz, caemhcai youh ceng'aeu ndaej boengj ganbu、conghgyah、gyausou、

yozej、canghvwnzyoz yisuz、cangh-hongsonsaw、canghhong' yw、cangh-dinfwngz gunghcwngz、canghguenjleix ginghei daeuj daengz swcigih guh hong. De gyaezhoh ganbu, aeueiq vunzcaiz, ciengj fad faenmingz. Haujlai ganbu cungj gamjdaengz youq lajfwngz de guh hong vuenheij dangqmaz, youh ndaej cungfaen baijok gij caizganq bonjfaenh.

(caengz sat)